



TAPAK 9

EVMs nung tamang makateter, ballot amshitsüla: Akhilesh



TAPAK 8

CBFC züngsemtem tsüngda tangatetep ka alitsüla: Sonakshi Sinha

VOL. XIV NO. 176 (ADOK 176)

DIMPUR

SUNDAY

APRIL 16, 2017

5.00

## ACAUT-i Chief Secretary dang mepishir

**Dimapur, April 15 (TYO):** Rural Development department-i senotsü ketdangsüa amshiba aser talisa MGNREGA Central fund amshiba indang CBI nem bushisüngdang südakjang ta ACAUT Nagaland-i Chief Secretary dang shidi ka nung mepishia metetdaksüogo.

Iba onük nung aibelenertemji Indian Penal Code, 1860 aser Prevention of Corruption Act, 1988 kübok ken o angadanga temerenshi agütsüsü mepishir, ta parnokisa shidi nung ashi.

MGNREGA kübok senotsü lezmüksüba agitsü atema Rural Development Department nung ketdangser kari yimjak nung Medziphema Village Council nungi blank cheques meshiba osang angazükogo aser iba ya ozüng alema inyakba aser kanga tim masüba inyakyim ka lir.

March 24, 2017 nü Medziphema Village Council sessional Chairman aser sessional Secretary nati osangkaket balala nung Rural Development Department ketdangsertemi parnok nem blank cheques nung sign südaktsüba indang osang metetdaksüogo.

Ketdangsertemi tashiyim agi Chairman aser Secretary dang

nungi cheque tazünglaji meshiba liasü aser March 18 nü Lokti senden amendang, VDB Secretary aser Chairman Medziphema Village Council nati joko kodanga Rural Development department nem cheque tazüngla magütsütsü telemtetba agi, ta ACAUT-isa Nagaland Chief Secretary dangi züluba shidi nungsa shia lir.

Tang nungi cheque nung beneficiary indang tenüng, sen tangutsü tim aser fund/money amshiba indang osang tejangia alitsüla, ta Medziphema Village Council-isa telemtetba agiba osang metetdaksüogo.

Department-i mesüra officer/BDO temi department indang maparen inyakba atema blank cheque meshiba inyakyimji ozüngi memelar aser iba ya department aser ketdangsertemi tashiyim agi village council madak mapa inyakba ka lir. Anungji, Medziphema Village Council indang onük dang masü saka department aser ketdangsertem iba mesükba ozüng alema inyakba mapa bushisüngdangtsü atema CBI nem mapa nunglokjang, ta ACAUT-i Chief Secretary nem takhangba agütsü.

## Gandhi-i agiba Champaran Satyagraha küm 100 ajunger

**Motihari, April 15 (Agencies):** Mahatma Gandhi-i Champaran Satyagraha agiba sülen küm 100 ajungba bilemteta tanü Bihar nung sentong ka agiogo.

British nunger yimsüsüba mapang aluyimertem nem tashiyim agi indigo yimdaksüba anema Mahatma Gandhi-i Champaran Satyagraha ayonga agi.

Tanü iba sentong bilemteta nisung kati Gandhi ama sübor train ka nung Bapu Dham station-i aru aser idakji Union Minister aser local MP Radha Mohan Singh aser Tara Gandhi (Mahatma Gandhi'er semchir) nati pa pela agizük.

Iba mapang Bapu Dham station nung tanurtem aikati linük wako bener aden aser Gandhi

ama sübor aruba nisung train nungi ayazüka aludang "Bharat Mata Ki Jai" aser "Champaran Satyagraha Zindabad" ta yimiyimtem ayim.

1917 nung atalokba ama iba kasa train ji April 22 nü Bettiah-i apusoa aotsü, ta Motihari station nung Assistant Station Master Khurshed Iqbal-i osangbener dang ashi.

Champaran Satyagraha küm noklangjungmung tenüng nung tayongertemi iba ya jilushi ka ama renemer sayur. Mahatma Gandhi-i British nunger yimsüsür anema mezüng lungkak aitba sentongji iba ya liasü aser iba tatalokba ta tanü lanurtem aser tanurtem dang angateta sayutsü nükjidong nung Champaran Satyagraha jilushi sayur.

## IITs nung tetsür kaketshir talila admission sütettsü

**New Delhi, April 15 (Agencies):** 2018 academic session nungi Indian Institutes of Technology (IITs) nung tetsür kaketshir teimbai admission sütettsü, kechiyong tanü admission board-i tetsür kaketshir nem "supernumerary" mendentem lezmüksütsü mulunga agizükogo.

IITs nung tetsür kaketshirtemi admission mesütetba khuret bona, yaküm Joint Admission Board (JAB)-i professor Timothy Gonsalves menden sür luden ka nem iba khuret koktetsü atema lenmang bushitsü mapa nungloktsü, ta HRD ministry ketdangser kati ashi.

(Maneni tapak 11 nung...)

## Modi-i BJP National Executive senden nung adener



April 15, 2017 nü Raj Bhavan Bhubaneswar nung Odisha Angh, Dr.S.C Jamir aser pa kinungtsü Alemla Jamir nati Prime Minister, Narendra Modi pela agizükdang agiba noksa angur.

**Bhubaneswar, April 15 (Agencies):** Uttar Pradesh aser Uttarakhand assembly elections nung takok tulu anguba aser ano Manipur o Goa nung parnoki anir sorkar kümteba sülen BJP-i Odisha dak tenük yoker.

Odisha yimtiba Bhubaneswar nung anogo ananü BJP National Executive meeting ayongzuka amener aser iba nung Prime Minister Narendra Modi aser BJP Tir Amit Shah na adener.

Tanü Bhubaneswar atongba sülen PM Modi-i indangindanga Raj Bhavan semdang aser idakji Odisha Angh, Dr S C Jamir den ajurutep. Iba sülen party züngsemtemi meiner pa senden amenba tesemi ao.

Bhubaneswar kübok Janata Maidan nung aliba Sant Kavi Bheem Bhoi Sabhagar nung amenba senden nung BJP-i Odisha assembly elections aser 2019 küm Lok Sabha elections dak sendakba onüktem lemteptsü.

Tanü amenba senden nung

mendenji Amit Shah liasü aser pai party lennirtem dang ashiba agi, "BJP atema tang ya tetenzüker ka dang lir aser tarutsü nung India ajungalen amentetsü atema party-i takok ngua mapa inyaksüla."

"Kodang asenok 2014 nung Centre sorkar akümtsüsa tashi angu, nübortemi BJP-i tenemlak tongogo ta jembi. Taküm assembly elections nunga takok angudang parnoki kasaji ashi, saka president Amit Shah-ibo BJP-i ano tenemlak matong ta ashir. Panchayat nungi Parliament tashi nung BJP alitsüla aser iba jagidang tenemlak atongbaji asütsü ta pai shiogo" ta BJP lennir Ravi Shankar Prasad-i tanü osangbener dang ashi.

"BJP-i Congress bo ajangtettsü saka regional party tem tsüngdang parnoki tamakok angur ta yimtenren nung mongin nisungtemi ashi saka assembly election result temi iba tangatetbaji melenshiogo" ta Prasad-isa shise,

Electronic Voting Machine (EVM) nung tim mesüi mapa

inyak ya yimtenren telok kari aitsüba atema BJP president Amit Shah-i tanü ashiba agi, "Uttar Pradesh aser Delhi nung parnok tashi angudangbo SP, BSP aser AAP teloktemi EVMs amshiba atema mashitetep."

"Taküm elections nung parnok tamakok anguba sülen, party kari tatemtsü atema EVMs onük nung ammeter. EVMs dak tai tongloktsüba ya Election Commission akhüm metsübuba sayur" ta Prasad-ia ashi.

"State pungu nung assembly elections magidang PM Modi-i state ajak sema senzü aser tang linük nung lennir nungtugutibaji pa lir. Pai nübortem den sendaktepba ajanga, nübortemi pa dak temulung alemer. India nüjiso anguba sülen, nungtugutiba lennirji pa lir" ta Amit Shah-isa metetdaksü.

Anogo ananü senden nung Uttar Pradesh chief minister Yogi Adityanath-i anir BJP Chief minister 13 prong den teyaritepertem aser Union minister 45 tashi adener.

## Manipur nung Jayentakumar-i Minister menden toktsüba shidi agütsü

**Imphal, April 15 (Agencies):** Chief Minister N. Biren Singh-i meinprongba anema Manipur nung Minister L. Jayentakumar-i pa menden toktsüba shidi ka agütsüba ajanga Manipur nung BJP-i aniba ita ka sorkar atema mepetmesü ka adoka lir.

Jayentakumar-i ashiba agi pai Chief Minister Biren den jembioago aser pa Mongulbarnü state-i meyipa aruba sülen tatembang telemtetba ka agitsü.

Jayentakumar-i Health portfolio den tanga department asem tashi amsema inyaka liasü aser pai osangbener dang ashiba agi, Mongulbarnü Chief Minister Biren Singh Delhi nungi meyipa aruba sülen tatembang telemtetba ka agitsü.

"Pa malidang telemtetba ka magitetsü" ta Jayentakumar-isa ashi.



L. Jayentakumar

Biren-i meinprongba anema Hokolbar nikongdang pai minister menden yutsüba shidiji agütsü, ta paisa shisem.

Chief Minister Biren Sinbh-i iba onük bentetsü atema Delhi-i ao ta osang angazük.

Pa indang official maparen nung Biren-i teka aiba aser meinprongba atema pa jashir ta Jayentakumar-i Chief Minister

dang ashi.

Biren-i Department of Personnel Minister in charge bona lir aser pai Jayentakumar den asüngdangya mesüi Health Director, Okram Ibomcha mapa nungi anentsüba atema Jayentakumar-i mepelar.

Ibomcha aitsüba kuli tejangja maliasü aser pa mapa nungi anentsüba shidi nung 'disciplinary actions' atema anentsür ta dang shia lir. Ibomcha ya taoba Congress Chief Minister Okram Ibobi Singh'er kinunger ka lir.

March 15, 2017 nü Manipur nung Bharatiya Janata Party(BJP)-i aniba sorkar tentetdang National People's Party (NPP) nungi MLA 4 densema liasü aser par pezü rongnung Jayentakumar ka lir.

(Maneni tapak 11 nung...)

## Kma nung tebang-mechi chimar alirtem nem surgery agitsütsü

**Kohima, April 15 (TYO):** Küm ka shi lir maneni Oking Hospital, Kohima nung April 29 aser 30 nü Nagaland nung tebang mechi chimar alirtem (Cleft) aser palate patient tem surgery angati agitsütsü.

Smile Train, India-i Mission Nagaland of Shija Group of Hospitals, Imphal kübok Oking Hospital Kohima ya tebang mechi chimar alirtem surgery agija taneptsü ngudaksütsü atema Centre ka ama züngokogo, ta Smile Train Partner plastic surgeon of Shija Hospitals nungi Dr. Kh. Palin-i tanü Kohima nung aliba Hotel Japfu nung osangbenertem dang ashi.

Pa den Shijah Hospitals nungi mongintem aser Oking Hospital Kohima nungi nurse temi yaritepa surgery agitsütsü.

Nagaland nung tebang mechi chimar alir nisung 3,300 shibo alitsü, ta shia paisa, meta talang nungi aser yimtsüngtem nungi



April 15, 2017 nü Oking Hospital, Kohima nung Dr. Palin aser Dr. Vikethonyu Kesiezie nati osangbenertem senden nung külemi jembidang tangokba noksa nung angur.

arur patients nem ainlen senzüdang intokba senotsü meyipa agitsütsü, ta metetdaksü.

Mission Nagaland kübok aser Oking Hospital Kohima senteper yaritepa tang tashi nung Smile Train Cleft Shija Project-i Nagaland nung tebang mechi

chimar alir nisung 600 shi surgery agitsügo.

Paisa, angati mozü, angati surgery densema treatment ji angati asütsü, ta ashi.

Cleft week ya April 17 nungi 23 nü tashi amungtsü aser iba mapang nung cleft lip aser palate awareness agitsütsü.

## Ozüng amshitsü police nem tashi agütsügo: Manipur CM

**Imphal, April 15 (Agencies):** State nung ozüng alema inyakba mapatem mita repringtsü aser ozüng benoktsü atema police nem tashi agütsügo, ta Hokolbarnü Manipur Chief Minister, N. Biren Singh-i metetdaksü.

Minister tem aser MLA temia police mapa nung tiyongtsü maitsü ta shiogo, ta paisa metetdaksü.

Biren-i Home portfolio-a bensema lir, aser pai sentong ka nung websites ana tenzüksüba sülen osangbenertem den jembidang iba osang metetdakja liasü.

Websites anaji- anti-

corruption cell website aser kaji nüburtem dang terenlok mapa project balala metetdaksütsü indang website lir.

Pai ashiba agi, "Websites anaji ajanga ochimashi maliba yimsüsüba agütsütsü aser nüburtemia shilem agitetsü."

Biren-isa, "Küm aika Manipur nungbo aonung mapa meinyaker. Aonung atongtsü anasa shishilembarlemi dokan shibangadoker, ajisüaka linük nung tanga tesemtem nungbo aonung tashi shishilembar," ta ashi.

"Aonung dokantem lapoka shishitsü atema ni shishilembarlem dang mepishir.

Nisung tamajungertem azioktsü aser tzüzüing-ozüng benoktsü atema police-i mera ajak agitsü. Nüburtemi mobile phones ajanga tongteprateptetsü. Sademsadema inyaksü atema Police nem tashi agütsügo," ta paisa metetdaksü.

Dry state, Manipur ama ka nung yi kanga buloa yoktepa ajanga süngmanger, ta shia pai, yi agi mesepba ajanga tzüzüing ozüng teblemetsü adokdaksür, ta ashi.

Paisa nüburtem dang, ozüngi memelaba yi ayokba aser temesepba mozütem ayokba osang police nem metetdakjang, ta mepishia metetdaksü.

## 32 Assam Rifles sepaitemi tapoktsü osettem aika apu



**Dimapur, April 15 (TYO):** HQ IGAR (N) kübok 32 Assam Rifles sepaitem aser police senteper April 14, 2017 nü mita aodang Mon Basti, Langrijan nung aliba melung malemba ki ka nungi Gelatin sticks 63, Detonators 100 aser Safety fuse metre 200 apu, ta Honibarnü Assam Rifles-i sangdong ka ajanga metetdaksü.

Iba dak sentakba nung R/o Langrijan, Karbi Anglong District, Assam nung alir asür Sashi Ao kinungtsü arishi küm 41, Marsenla puogo, ta Assam Rifles sangdong nungsa metetdaksü.

Maneni iba ken o bushisingdangtsü atema la den apuba osettemji Dalai Police Station, Karbi Anglong, Assam ket nung agütsügo, ta Assam Rifles sepaitem sangdong ajangasa metetdaksü.

## KODH foundation day April 16 nung amungtsü

**Kohima, April 15 (TYO):** Kohima Orphanage & Destitute Home (KODH)-i parnok indang 44buba foundation day April 16, 2017 nikongdang 2:00 ako nungi Kohima nungi kilometer 5 pilar aliba KODH nung amungtsü.

Tang KODH ya asür Zaputuo'er jala, Neibanuo-i achaayanga repringer.

KODH tentetsang aser KODH Tir, Ama Zaputuo-ü Angami 2011 küm March 24 nü arishi küm 89 alidang alima nungi pilaa liasü.

Asür Zaputuoü Angami-i mangdang tajung yur Kohima Orphanage and Destitute Home (KODH) ya 1973 küm tenzüük aser la asüba anogo tashi (küm 38 tashi) iba home ya achaayanga liasü.

Iba dak sentakba nung KODH-i temeimer ajak dang iba foundation day sentong nung adentsü pelashishia jaokba den külemi tamang sarasadem aser aser senotsü tenla agi KODH yarir ajak dang pelaba metetdaksü.



April 15, 2017 nü Ongpangkong Salang, Mokokchung nung Watsu Mungdang-i ayongzükba Girl Child Trafficking awareness programme nung DIET Mokokchung Asst. Professor, Oditola-i jembiba noksa nung angur. Iba sentong nung tetsür 200 dak tema dena liasü. Mokokchung, April 15, 2017.

Angh-i Shaurya Chakra award angurtem nem tenüngsang agütsü

**Dimapur, April 15 (TYO):** Nagaland aser Arunachal Pradesh Angh, PB Acharya-i Atu Zumvu aser Captain EY Jami nati April 6, 2017 nü Rashtrapati Bhavan, New Delhi nung linük Tir ket nungi 'Shaurya Chakra' award agizükba atema tenüngsang agütsügo.

Angh-i, ketdangser anati Naga nunger aser linük nüburtem nem konang

nüngsang bener arutsügo, ta ashi.

Item awards ajanga ketdangser ana dak tasütait aser nendaka inyakba tanüla aliba sayur, ta shia Angh-i maneni Nagaland Police aser Indian Army tangatetbatem wazüka ayutsü aser parnok ajanga lanurtem ajungshitsü aser parnok atema tatishitsü agir kaka asütsü ajungshir, ta metetdaksü.

## Angh Acharya-i Neingupe nem tenüngsang agütsü

**Dimpaur, April 15 (TYO):** Nagaland aser Arunachal Pradesh Angh, PB Acharya ya "Swachh Bharat Mission" atema National Ambassador lir aser pai, Neingupe Marhu-i 'Clean India' dak sentakba nung pa indang Maruti Van agi jana intokba gari küma yanglushir Pfutsero jila merüktetba atema pa nem tenüngsang agütsügo.

Angh-i, iba mapa tajung

ajanga Marhu-i teblemetsü katsüba dang masü saka loktiliba nung pei teinyaktsü angatetba sayur, ta ashi.

Acharya-isa Marhu dang lokti atema maneni mapa tajung inyaksü ajungshiba den külemi pa mapa tajung ajanga lanurtem aika tatishitsü agitsü aser Pfutsero jila merüka ayutsü atema pa tsüngsü nung jajatsü ajungshidaksünier ta mepishio.

## Manipur nung PREPAK (PRO) telungpur ana temai adok

**Imphal, April 15 (Agencies):** PREPAK (PRO) telungpur ana temai adoka Manipur Chief Minister, N Biren Singh nem raraba oset bendanga agütsügo.

Iba dak sentakba nung Biren-i, sorkari telungpurtem dang temai adoktsü mepishir, ta ashi.

PREPAK (PRO) züngsem anaji ka Sergeant Major Salam Sitoljit aser S/S Corporal Pebam Bishorjit na liasü.

Salam ya Eastern Nagaland, B2 Camp Taka, Myanmar camp nungi lir aser Pebam ya Nongket, NCTF( Nongpok Chingkhel Task Force),

Myanmar camp nungi lir. CM-isa, temai adoker nem teyari agütsüba inyakyim repringshitsü, ta metetdaksü.

CM-isa, sorkar matsüngdangi temai adoker telungpurtem aser parnok kibongtem kümzüka ayutsü atema sorkari inyaksü, iba den külemi parnok kiojen aser takütem kümzüka ayutsü, ta metetdaksü.

Iba sentong nung Deputy Chief Minister Y Joykumar, Cabinet Minister tem, Parliamentary Secretary tem, DGP, Additional Chief Secretary (Home) aser police ketdangsertema dena liasü.



Assam kübok Tinsukia district nung Chinese Ambassador to India, Luo Zhaohul-i Lekhapani nung aliba Chinese war cemetery semdangdang agiba noksa angur. Zhaohul den pa kinungtsü aser Chinese embassy in India nung staff pungu meina aru. Parnok Honibar aonung Dibrugarh nung yipzükba sülen Deobarnü Delhi-i aotsü. (Tinsukia, April 15)

### Tripura HC-i summer vacation mapang ken o angadangtsü

**Agartala, April 15:** Tripura High Court-i May 15 nungi tenzuka anogo 11 summer vacation mapang okadak ken o bangdaka alibatam angadangtsü, ta Hokolbarnü ketdangser kati metetdaksü. "High Court-i ozüing alema inyakba mapatem aser gari

lendong atalokba dak sendakba nung ken o tejentem May 15 nungi tenzuka 18 tashi nung tanga jungdak ken o den külemi angadangtsü," ta HC nung ketdangser kait ashi. Maneni pai ashiba agi, summer vacation tanüingba

anogotem nung May 25 tashi 10:30 nungi tenzuka 'court Registry' ghonda asem atema lapoka alitsü. Tripura High Court Chief Justice T Vaiphei-i nüburtem ajangzükdaksütsü mechi nung iba jenjang agia liasü, ta ketdangser-isa ashi.

### Jamiatul Ulema züingsemtemi CM den ajurutep

**Guwahati, April 15 (Agencies):** Jamiatul Ulema nungi züingsemtem aser MP, Badruddin Ajmal nungeri Assam CM'er kidang pa ajurua Assam nung aliba Muslim nungertemi timtem ajuruba aser talisa parnok aliba tesemtem nung tekümzükba maliba metetdaksü. Badruddin-i CM dang Guwahati High Court-i 2017 küm telemtetba agütsüba anema tezüluba nung ozüing ka agütsütsü asoshi mepishe. Okadak telemtetba agütsüba ajanga, Panchayat Secretary mesüra BDO ajanga lisopur kuli certificate agütsüba ajak taila ta sangdong. Iba ajanga Muslim

nunger lakh 48, talisa tetsürtem parnok tenüing züingsemtsü asoshi tasak kümogo. Supreme Court-i 'National Register for Citizenship' maparen tekeraba nung tembangtsü asoshi tetuyuba agütsü. Iba sülen Assam sorkari NRC tekeraba nung renema tembangtsü asoshi 'cabinet committee' ka denteta liasü. Iba committee ajanga document list ka yanglua liasü. Iba nung document 12 kuli tejangja akaba aser asem kuli peria malibatam ta sangdong. Iba document nung tetsür ka tsürapur ki doktsür kinungbur kidang aodang Village

panchayat mesüra circle officer-i 'linkage certificate' agütsüba tagidak mali ta sangdong. Iba document ya State aser Centre sorkar, High Court, Supreme Court aser Registrar General of India-i agizükogo. Iba tetuyuba nung NRC renema dak sendakba nung maparen shilem 80 bo temer liasü, saka Guwahati High Court ajanga 2017, February 28 nung telemtetba agütsüba ajanga item certificate tem taila kümdaksü. Iba dak sendakba nung Badruddin-i CM dang iba ken o repringshitsü asoshi mepishe.

### Kaketshirtem dak teim mesüi kongshiba atema tesayur ka mapa nungi anentsü

**Shillong, April 15 (Agencies):** Kaketshirtemi kanga tasüita nokdakba ajanga tebur tesayur ka mapa nungi anentsüogo. Iba tesayur ya kaketshirtem dak tim mesüi kongshiba ken o nung aija mapa nungi anentsü. West Khasi Hills Deputy Commissioner, Arunkumar Kembhavi-i ashiba agi, iba tesayur tenüing ya Vishwajit Jha ta jangjaogo. Pa West Khasi Hills district kübok Nongstoin tesem nung Jawahar Navodaya Vidyalaya school nung Physics tesayur liasü. "Tetsür kaketshirtemi kanga tasüita March 23 nü Executive Magistrate ka school semdangba mapang iba osang agütsü," ta Kembhavi-i ashi.

Mezüing bushisüingdangba nung agütsüba osang dak ajemdaker, West Khasi Hills district Extra Assistant Commissioner, District Social Welfare Officer aser Deputy Labour commissioner nunger densema committee ka denteta liasü. Committee ajanga March 29 nü kanga junga bushisüingdangba sülen, kuli tejangja nguteta April 10 nü iba tesayur mapa nungi anentsü. District ketdangsertem ajanga JNV Samiti Shillong dang, 2012 Protection of Children From Sexual Offenses Act (POCSO) kübok tesayur anema ken o benoktsü asoshi tetuyuba agütsü.

"Iba mapa ya mapang talangka inyaka aruba maparen ka lir, saka shingaia osang magütsü. Pai aibelenba ya POCSO Act, section 11 kübok merenshitsu langa lir," ta pai ashi. Aji saka school-i tang tashi nung police ket nung ken o kecha benoka mali. "Iba tatalokba ajanga, tanurtem dak teim mesüi benshir jenbuttsü ta bilemba nüburtem atema tatishitsu ka asütsü," ta DC-i ashi. Pai maneni tanurtem dang iba amala tatalokbatem meimbanga meyui ketdangsertem nem metetdaksütsü asoshi ayongzük. "Ozüing-i nenok kümzuka ayutsü," ta DC-i maneni shisem.

### BJP MLA TT Haokip HAC mendenbuba shimogo

**Imphal, April 15 (Agencies):** BJP legislator T Thangzalam Haokip shiba dang TT Haokip ta ajar, pa Bodhbarnü Manipur legislative assembly indang Hill Areas Committee (HAC) mendenbuba shimogo .



Taoba mapang assembly speaker, Haokip taküm election nung Churachanpur district kübok Kuki-Chin-Mizo nung longsoa aliba Henglep constituency nung BJP nungi toktepa takok angu. Pa iba mapa asoshi shimba osang assembly secretary ajanga Bodhbarnü metetdakja liasü. State tenem lima nung aliba tesem dak sendakba maparen ajak HAC kübok lir. HAC ya ozüing kübok temang ka lir aser tenem lima tesemtem nung temzüing ozüing dak sendakba ken o ajak iba telok ajanga achaayangtsü. Kasa mapang nung 'Anti

Tribal Bill' dak sendakba nung Churachandpur nung amenloker aliba Joint Action Committee (JAC) aser sorkar na tsüingda senden tasembuba kecha telemtetba ka magi-i tembang.

### Guwahati nung hon seret 15 apu

**Guwahati, April 15 (Agencies):** Hokolbarnü Assam Police-i Guwahati railway station nung nisung asem ket nungi hon seret 15 puogo. Police-i Dibrugarh-New Delhi RajdhExpress train nung Henlason Vaiphei, L. Thanga aser Lalremsaimi nunger apu aser parnok ket nungi apuba honji sen crore 5 shi jenjang liasü. Ano tanga osang ka nung GRPF aser state police senteper Guwahati nung sen

500 aser 1000 notes tejen crore 1.10 puogo. Sen 1,000 aser 500 notes tejenji Brihostibar aonung Paltan Bazar nung gari ka nung bena lia apu, ajisüaka gari anisangji jena otet, ta police-i ashi. Ano tanga tatalokba ka nung, Hokolbar ayaterm nung police-i raiwal station nungi nisung ka tenüing agi, Rafique Ahmed ket nung brown sugar seret 1.5 bena lia puogo. Ken o anaprongji tang bushisüingdangdar.



Agartala, April 14, 2017: Hokolbarnü Agartala yimi tezülen tamangba yimsü benjung "Shiva Gajan" amongdang tamangertemi külem tamanger ka kojol angena aliba süngpak nung mejangdaksüba noksa nung angur.

### Sikkim nung BJP-i assembly by election nung tamakok angu

**Gangtok, April 15 (Agencies):** Sikkim nung Sumitra Rai-ibo vote 98 dang agu. Kasa menden atema election nung Independent candidate pongui senteper vote 449 dang ngua liasü. MLA Prem Singh Tamang menden nungi anentsüba ajanga iba menden azüingtetba agi election agitsüsa aküm. 1996-97 küm Tamang state Animal Husbandry department Minister inyakba mapang senotsü nung ochimashiba ken o nung pa Sharma-ibo vote 374 dang angu. Ano Congress candidate,

Sumitra Rai-ibo vote 98 dang agu. Kasa menden atema election nung Independent candidate pongui senteper vote 449 dang ngua liasü. MLA Prem Singh Tamang menden nungi anentsüba ajanga iba menden azüingtetba agi election agitsüsa aküm. 1996-97 küm Tamang state Animal Husbandry department Minister inyakba mapang senotsü nung ochimashiba ken o nung pa Sharma-ibo vote 374 dang angu. Ano Congress candidate,



Guwahati, April 14, 2017: Hokolbarnü Guwahati Railway Station nung GRP aser state police-i hon seret 15 apuba aser brown sugar seret 1.5 apuba ken o nung aibelener nisung pezü pua aliba noksa nung angur.



# TIR YIMYIM

## YIMOBILEM (EDITORIAL)

DIMAPUR SUNDAY, APRIL 16, 2017

### EMMAUS LENMANG

**Y**isu sür shia aruba otsü nung Emmaus lenmang nung nisung ana ooya alidang tena nem majittdaktsüi Yisu tena den atongsema aoba tatalokba nungji tanü ama Yisu tasü madak takok ngur shia aruba anogo bilemteta amongdang tanüla lesson aika angutsüsa ataloka lir. Yirusalem nungi Emmaus atongtsüba lenmang ya mile tenet shi talang ta Luke 24 nung shia angur. Iba lenmang nung parnoki mereprangtetaka Yisu den külemi aoba nisung anaji Emmaus yimtak alir kinungtsü aser kinungbo na (apuani) asü südi ta Laishirtemi ashir. Aji oda, tena ya Israel nunger asoshi alima yimli tasen ka arutsü imlaseta Yisu taküm alidang pa sülen anidakba teimla to ajak amajok ama kümer terata, tejashi aser tezüdang tia nung Yirusalemi nungi pei yim Emmaus-i meyipa aorba liasü. Atangji, tenati Yihuda nungertemi Yisu reshikangshia kangki nung angenlokba indang jungjunga meteta lir. Aji oda, tenati Yisu shia aruba osang tetsürtemi sangdongba indanga angashia lir. Tenati Yisuji ainker tuluka aser Yihuda nunger bendanger yimsüsüba talenba nungi alangzüktsü aru ta dang meteta liasü. Atangji, Yisu alimai aruba otsütem rongnung shia aruba yasa tongtibangtiba lir. Yisu asodang anüdoklen petinui tashitemeteterem Bethlehem tashi anir arua Yisu külemaka aser Yisu tain kümer sayatenya tapu aika inyakaka, Pa sür shia maru asübo atangji paji ainker ka dang liasü. Aji oda, tsüngrem asünunga alima meimchirtemi külemba tanga tsüngremtem den kasasa süla. Ajisüaka, Yisu sür shia aruba agi Paji tsüngremtem madak Tsüngrem dang masü saka tasü tsüngremtem madak atangji taküm Tsüngrem ta kuli sayutetogo. Ajisüaka, Emmaus lenmang nung jajaba nisung ana yagi Yisu shia aruba osang dakji mamang, iba jagiang tena mulungjang tejashi agi sünga liasü. Iba anogo nung tenati Yisu par kidangi maniok asübo tena Tsüngrem nungi pilabaji teti atema tepilar süla aser teti takümdaki aotsü melen teti tesamadaki ola. Kodang Yirusalem nungi Emmaus yim atong tenati mereprangtetaka tena den külemi sensaksema aruba dang masü saka tena dang tamashi shia arütsüsangji tenati meima tena kidangi aniok. Iba sülen kidangji kodang parnok külemi chiyongtsü asoshi sarasadem, idangji dang ki kibur anaji tanüla tenük lapoka shia arusang Yisu Khrista-ji reprangtet. Tena asoshi Yisu reprangtetba mapangji Laishiba angatetba mapang liasü. Iba aonungjisa tena kidangji anisüngzüka melitet Yisu shia aruba indang kuli asütsü asoshi Yirusalemi meyip. Tena Yisu den külemi jajaaka tenati par kidangi anioker tena akaba chiyongtsü melemsatep asübo Yisu shia aruba takok aser tekümtetji tenati mengula. Aji oda, tenati mena melitet Yirusalem tashi oagi Yisu nütsüng terka den külemi kilong nung adenshia alirtem dang Yisu shia aruba kuli tesüdak nung iba takdang jagi Yisu aru aser parnok rongnung nokdak. Iba mapang tashi nung tamanger telongjem (arogo) metenzük liasü. Ajisüaka, nütsüng ter ana den parnok medemer aser kinungertem ki ka nung adenshibaji sentep kidang adenshia akhi shin o aser tatalokbatem indang jembir amai liasü. Aji oda, asenok ajak asoshi tesüngmangtsü aser tekümdangtsü kaji, sentep kidang tangur kari Yisu shia aruba kuli tesüdak nung parnok ajaki ngua Yisu arua nokdak nung parnoki Pa nüng sanga külemtsü melen tsübua adok aser parnoki Yisuji temenen tanülaa ta bilem. Asenoki kümsa küm tenla kidang adenshili Yisu külemli ta aruba mapa nung tebilemdangtsü tesem tajung ka yangi angur. Tanü asenok tendaka tenla kidang Yisu tanüla o temenen tanüla na mebendangtetba amangba purtem aika lir. Asenoki Yisu dak amanger saka Laishiba mangatetba agi tamang tulu küma meintetter. Asenoki Yisu dakbo amanger saka Pa asenok den aliba asenoki memetetter. Asenoki Yisu asenok melen asü tabo amanger saka asenoki Pa tanaben asenok anir arutsü ta asüba nung mamanger. Emmaus lenmang ya asenok anogo shia jajaba lenmang lir. Iba lenmang ya Yisu ajurua pei kidangi, tetezü, pei mulungjangi aniokba lenmang lir. Aji oda, asenoki mereprangtetaka, teti Yisu Khristaji asenok den lir ta amangdgi. Iba tamang aser teimla nung Shia aruba Tsüngrem chir Yisu Khrista tenüng sangdi.

## OLEMSABANG

### PA SHIA ARUOGO

- Mrs. R. Mapula. Pongen  
Chuchuyimlang, Merangmen, Tsürangkong

Sentsüwangshi tamaren Kotak li nungi,  
Tesembatsü temenen limai, Tsüngrem temeim sempet tulu,  
Amang nung ajemzüa alir dangi tesangwa milen bener  
Maksü aser timtem khuret abentsü alisang Tsüngrem San chanu,  
Iba temeim alang ya ali nungbo kecha sempet-a makaka  
Ali meimchirtemi iba temeim indang tebang agibo jembitsü  
tamakoktsü.

Alimai nüngtugu süa mejembiba tetsür Mari ajanga,  
kümtedakba Yisu Khrista Bethlehem nung aso  
Pa asodang Chuba kidang tsüngtsüng matem, mistri kibong ka  
nung intet,  
Tepenjem mapang ajunga akümüli tia jangra matem ali  
Meimchirtem rongnung kari danga nai junga inyakogo ta ashir  
lilasang,  
Ozü tanüla anisüngzük ngula, saka ya ajak aremtsü Yisu alimai  
aru.

Yisu-i akümüli mapa tatemer ta meteta liasü, Pa shidakba Tsüngrem  
chir ta,  
Ainkari küm aika lia shinba otem... asangsang nung atalokogo,,  
Yirusalem nung kümtettsü benjong amongnü, atangji nung jungkai  
atok,  
Kotak aser ali chuba ta, tulu tila ajaki ayimten  
Ajemalu Gado rongdong nung sanger, tsüngmok amoker medem,  
Aongmetang ola jagi meimchir molungjang anakshimeso.

Ali pokli nungi shingaia mesemdangba korang ka Yisu-i asem,  
Nakrema meremba sü ka abenlokja parnoki pa nem salem agütsü,  
Na Yihuda nunger chuba ta sensaja apudaka Pa külema  
mezüngmeshi,  
Pa dak tekolak nung ritsüng agi azük, aya tzüra telumi tia pai  
ajuru,  
Lenmang piyong kangki taret apur jajadang, aria bilemetsür shinga  
maliasü,  
Oh! Yisui ayi korang asembaji, asenok nem tekümtet agütsütsü  
mechi liasü.

Golgata tenem tonger Pai apuba kangki nung angenlok, ibai Yihuda  
nunger Chuba ta zülu,  
Ni tzürar ta ashidang, tanükertemi Pa nem tasentsü jemdaktsü,  
OBA, kü tanüla nü nem bendanga agütsür ta shia amuzüka ao,  
Tanükertem rongnung Pa suoshi lemsa, leper tasen ka nung  
parnoki pa arem,  
Iba lep manung temaitsü ajenloktsü, aser Rom sepaitem nem  
nükdaktsü,  
Onoki Yisu tepsetogo ta pelatepa tsüngsangtep.

Reprangang... Aoksa -a tepelatsü osang ka, leperi Pa memeyimtet...  
OH tasüba, nü temedakba ain kong ali ! Oh leper, nü talenba  
yongrak kong lir !  
Pelatepang, Yisu shia arua lir ta alima dang ayimokjang,  
Tanü Yisu taküm lir, asenok asoshi tekümtetji pai alangzüktsüogo,  
Tajepba, mulungzürep, tetsübu, terara ajak tepela agi  
melentsüogo,  
Tsükchirtem ajak madak takok ngur, Pa asen den lir. HALILIYA !

**Iba Olemsabang nung lemsaba ken-o aser shisatsü ya iba ocet zülur-i  
bilemba ken-o ama tazünger-i angateta agitsü mepishir**

## Masüba Taküm Dangi Shia Arutetba Yisu

- Mr. R. Lipok Jamir  
Aoyimti

Paji.... Tsüngrem khuli, ochi aser temeshi ta metet, saka tepset, anungji tsübuseta ali. Mathi 27: 62-64 \*Tang asüngji, aji terenemba anogo sülenji, puti ungertem aser Farisitemi Pilat madang külemi sentepa ashi, \*Tamarener, iba tekalakbai pa taküm alidang ashi, Asemnü lir ni tanaben shia arutsü, o ya onoki bilemteter. \*Anungji asemnübuba tashi leperji anüksü ozüng agüjangma, ashiko pa nütsüngtemi arua pa auyaa or, Pa tasü nungi shia aruogo, ta nisungtem dang ashitsü; aji oda süra mezüng tai dang nungi tesü taiji tamajungba asütsü.

**TSÜKCHIR MAKSÜ ANGU (Choral)**  
**R. Lipok Jamir SWM 12/ 02/ 2016**  
**Key- Doh in A 3/4**

All = Tepelatsü osang tajung ajaki angang;  
S = Yisui tasüba leper madak takok tulu angu;  
ATB = Yisu Khristai tasüba aser Pa aremba leper nungi shia arua takok tulu angu;  
All = Tesüngmangtsü osang tajung ajaki angang;  
S = Tsükchir maksü angu, menen ajak rümogo.  
ATB = Tsükchir maksü ngua menen ajak rümogo; samaogo.  
Alto solo = Tenük merema, kanga sümba, arishia atala;  
All = Kangki taretji apuloktsü, Pa asüktema, rishikangshia,  
Pa pukümer mali, taochi mesayu südaktsü.  
Duet.. Alto/Tenor = Temeshisang Yisu Khrista, Pa ainket mapa agi menen tsükchir ajak maksü angu, menen mapa ajak rümogo;  
Ajiang! Tang Yisu koda, Pai sentsüwangshir, Yisui taochi tepela toktsür;  
(Alto solo = Gatseman nung Pa lumiba All= agi asenok kümettsü.) 2. Times  
All = Asen temenen kalvari nung shitokja medendaktsü (Paisa) nisungi Pa ajungba mokok aji, mezüngi jentoka tepset; Yisu shia arua temeim sayu, Halleluya ! Pa nüng sangdi. Amen; Amen.

## ANOGO ABEN TSÜNGREM DEN

### PA SHIA ARUOGO

Pa yangi mali, kechiyong pai ashiba ama, pa shia aruogo;  
arung pa mejangdak ajiang. Matt. 28:6

Yisu shia aruba ya asen Khristan tamang tamendakdak lir. Yisuji tasü madak takok ngur shia maru nungbo Khristan tamangji tasü, amajok ta 1 Kor. 15:16 nung shia lir.

Anungji Yisu shia aru nungji ya asen tamang tamendakdak lir. Marakzüba lungji kechai-a melenshitsuü makokba lung dak asen tamang amendaka lir ta tenyar Paul-i küli agütsür.

Shia aruba ya meimchir asoshi Tsüngremer sentong liasü. Shia aruba jagi Yisuji Tsüngrem nungi ta jangja-a metendaktsür. Tejen Lai nung Yisu asotsü Pai inyaksütem mapa, Pa asütsü, shia arutsü item shinba ajak yagi Khristan tamang abensadaktsüogo.

Anungji iba dak shirnoki amanger parnok ajak Tsüngremi metendaktsüogo. Parnok rongnung asenoka adentsüsa Pa dangi asen menen mulung bener odi. Shia aruba Khrista kechi koda leper koker shia aru, aji oda asen menen leper doktsüdi aser shia aruba Yisu dak amanga Pa tsüngdangi odi. Pai shidoktsütsü, aneptsür aser arishi agütsütsü.

**SARASADEM:**

**Haliluya shia aruba Yisu, kü temenen leper doktsür Nü taochi langpang dangi arur. Kü dang aochiangma ta mepishir. Amen**

### Khrista Kangki

Kangkiji kar asoshi aiatai  
Kangkiji kar asoshi atakatem  
Kangkiji kar asoshi menütong  
Kangkiji kar asoshi temenen  
Kangkiji kar asoshi tasüba  
Kangkiji kar asoshi shisamaka  
Kangkiji kar asoshi temetsüdaktsü  
Kangkiji kar asoshi tamashi.

**Saka**

Kangkiji kar asoshi teimla  
Kangkiji kar asoshi taochi  
Kangkiji kar asoshi temeim  
Kangkiji kar asoshi tanenptsü  
Kangkiji kar asoshi sempet  
Kangkiji kar asoshi yimjung  
Kangkiji kar asoshi tekümtet  
Na asoshi Khrista kangkiji kechi?

- Wb. Tozung Lkr.

## Middle East nungi Khristan yimsü atema lendong keta lir

**New York, April 15 (Agencies):** Tan hopta Holy Week amungdang Khristan yimsü poktetdak Middle East nungi Khristan yimsü ayipdoktsü merangba indang tebilemba abener.

Muslim nungter teimba ser aliba linüktem nung Khristantem reshikangshiba kanga bulua ataloker. Jihadist nungertemi tesem kar nungi Khristan yimsü ayipdoktsü meranga mapa inyaker saka linük kar nung Khristantem aser tanga tamangba yimsütem reshikangshiba sota lir.

Tanü alima nung Syria, Egypt aser Iraq linüktem nung Khristan yimsü atema lendong tulu keta aliba ajiteter.

**Egypt :** Egypt linük nütsüng yongsük nung Coptic Christian tem noklang nung shilem 10 shi lir. Islamic extremist temi dang masü saka Muslim nungter teimba kati Coptic Christian dak tenük yoka mapa inyaker.

Muslim Brotherhood lenir, Mohammed Morsi president inyaksü tenzüka sülen February 2011 nungi parnok reshikangshiba mapa kanga bulua tenzüka aser iba sülen tang tashi nung Khristan 200,000 shi linük toktsür jenogo ta Coptic lenirtemi ashir.

Mitkartemi Morsi atsüngdokba atema pa

pusemertemi Coptic purtem dak tai tongloksür aser iba ajanga Khristantem anema inyakba mapa kanga bulua aküm.

Egypt nung tang teinyakdak President Abdel Fattah el-Sisi-i Coptic purtem kümzüka ayutsü atema mapa inyaker saka taküm küm tsüngda Khristantem kanga mejungi amakba lendong aika atalokogo.

**Iraq:** 2003 küm tashi Iraq nung Khristan tamanger million 1.4 shi liasü. Khristan temi civil rights aika angu aser kija mesüra public nunga Khristantem jenjang tajung tongteta liasü.

Plain of Mosul ta-a ajaba Nineveh Plain region nung Chaldean, Syriac aser Assyrian Christian tem liyonga arur.

Ajisüaka, United States-i Iraq amakba sülen linük nung telok balala tsüngda mepetmesü adoka raratsü tenzüka. Item tatalokbatem nung tenlaki aika raksatsü aser Khristantemi Nineveh Plain tesem toktsür jena aotsüsa aküm aser yaküm küm tatemlem nung tamanger 275,000 shi ka dang anünga liasü.

Kiralongrar telok ISIS-i Khristan aser tanga nübo agi tangar memenepba tamangba yimsütem anema mapa inyaksü tenzüka saka tanü US coalition-i Iraq nung ISIS puri makdokba

tesem aika meyipa agiogo.

Iraq nung tanü Khristan yimsü atema lendong keta lir aser Chaldean, Syriac o Assyrian tamangertem tanaben linüki meyipa arudaktsütsü asü masü mejangja. Talisa, ISIS-i Assyrian jila aika auyi küma samatsüogo.

**Syria:** Tesüiba küm 100 tsüngda mpang teimbaka Syria nung Khristan tamanger aika liasü aser parnok linük nütsüng yongsük nung shilem 10 shi ka liasü.

Syria nung Khristantem dang Eastern Orthodox ta ajar aser anameta aliba linüktem dang nungibo parnok Syria nung talenba kanga mali liyonga arur.

President Bashar al-Assad'er sorkari arogotem mapa inyaksü, tamangba yimsü dak sendakba materials adoktsü aser kiojentem yanglutsü temelega agüja arur.

Ajisüaka, tanü Syrian Khristantem atema tebilemstü tuluka lir aser ibaji parnoki refugee mekümnüaka, Iraq nung sorkar atsüngdokba ama Assad'er sorkar atsüngdokra, Khristantem melitetsüsa tensa ka ajurutsü ana nung lir.

Assad'er sorkar matsüngdoki iba tensa ajangtetra, Syria Khristantem atema tia tajung asütsü saka yamaji ka matalokra, taruba sorkar jagi arogo kümzüka meyura lendong tulu ajurutsü.



Kohima nung St. Francis-de-Sales (SFS) Parish, Kohima Town züngsemtemi Good Friday nungtem nung yimdong sema senzüba noksa nung angur.



Chungtiayimsen Baptist Arogo nung children ministry nung Miss. Abenla CED lenniba kübok tesayur aser tila tanurtemi 'Good Friday' Yisui koda asen menen yong kangki apu aser kangki nung meta asüba item indang sayua aser tanur shia kangki kaka apur jaja tesayuba agütsüdang agiba noksa angur.

**OLONG PAITEP # 4393**

	1			2		3		4		
	5									6
			7							
8		9					10			
		11								
12							13		14	
				15						
				17						
	18									

<b>TIPILEN</b>		<b>LANGTSÜNGLEN</b>	
3. Miima agi	- (4)	1. Asoshi	- (5)
5. Tejangko	- (6)	2. Tashidak lung	- (4)
7. Aou teküp	- (4)	3. Bangsemo endok	- (4)
8. Mako / Melemzük	- (4)	4. Nütsüng züngdangba	- (7)
10. Saklok / Aket	- (4)	6. Tsüngpret	- (6)
11. Ali nungzüka aluba	- (7)	7. Asüng sür külen	- (4)
12. Talentsü	- (4)	8. Hai-haura aka	- (6)
13. Ak ayudak	- (4)	9. Telongtet	- (7)
15. Ajunga	- (4)	10. T _ _ _ _ _ tiba	- (4)
17. Meyong	- (6)	14. Tali / Onsara	- (5)
18. O jembitsü tashi	- (4)	15. Bilemdanger	- (4)

**OLONG PAITEP # 4392 TELANGZÜBA**

<b>TIPILEN :</b>	<b>LANGTSÜNGLEN :</b>
1. Awatsüng, 5. Aika, 6. Alulem,	1. Asang, 2. Ajunga, 3. Gado, 4. Mazük,
8. Otsü, 9. Gallil, 12. Atala, 14. Jila,	7. Meimtep, 10. Bangso, 11. Ajuru,
16. Pungzü, 17. Rone, 18. Rongrong.	13. Azüng, 15. Aser.

**ALOKBA'ER KIBONG EASTER SUNDAY ANEPDANG OTSÜ ATONGA CHIYUNGER**

**Haito, Easter Sunday, Christmas Day aser New Year anogo nungbo nisung aika arutsüako, saka 'Thanks Giving Day' amala nung nungbo kanga sapua marutsü adi.....**

**TANÜBO NAI LANGZÜANG**

Q: Saisapong nung amalitepa yariteptsü atema India-i koba linük den tezüngzüktep agi?  
 [A] Canada [B] United States  
 [C] Russia [D] Australia

(Taruba adok nung onoki langzüksü)  
**YASHIADOK TELANGZÜBA : Dawit Isaak**

**Tepela Tasoba Anogo**

Tanur asoba anogo nung salem osang den noksa angali adokdaksünura - Tenüng, Kim, School, Talidak & salem osang tejangja zülur, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimiyim bureau tem nung agüjang.

1. Tenüng : \_\_\_\_\_  
 2. Tasoba anogo: \_\_\_\_\_  
 3. Kim : \_\_\_\_\_ 4. Class : \_\_\_\_\_  
 5. School : \_\_\_\_\_  
 6. Talidak : \_\_\_\_\_  
 7. Salem osang : \_\_\_\_\_

**NAIA YA METETER MA**



India nung tang mezüng tzü-lenmang project "National Waterway (NW) 1" atema World Bank (WB)-i India nem sen million \$375 apotsütsü agizükogo. Kilometer 1,360 tzü lenmang ya Varanasi (Uttar Pradesh) aser Haldia (West Bengal) na tsüngda Ganga ayong nung yanglutsü. Iba project nung multi-modal terminals 6, RORO jetties 10, rong yanglushiba facilities alitsü. US sen million 375 million loan ji International Bank for Reconstruction and Development (IBRD) nungi angutsü aser iba nung ya grace period küm 7 lir aser maturity ji küm 17 lir.

**SUDOKU # 3506**

	3	5			6	2	9	1
		4			2		5	8
2	6		1	5				7
				4	3		5	
7						4	2	
		8	5	3	7			9
5	2	6	8				1	
			7	4				
3	4			1	5	9	8	6

**TELANGZÜBA # 3505**

8	3	4	7	2	5	1	9	6
5	6	7	3	1	9	8	4	2
1	9	2	4	6	8	7	5	3
9	2	6	1	3	7	5	8	4
4	1	3	8	5	6	2	7	9
7	8	5	2	9	4	3	6	1
6	4	1	5	7	2	9	3	8
3	5	8	9	4	1	6	2	7
2	7	9	6	8	3	4	1	5

**OJANG LUTEP # 3999**

ISKHRTA : □□□□□□□□  
 SÜTA : □□□□  
 DAMAK : □□□□□  
 TOAKK : □□□□□  
 AUBNGA : □□□□□□  
 AGJANA : □□□□□□  
 IMLTEA : □□□□□□  
 TEASN : □□□□□  
 AK : □□  
 ÜTSAGÜR : □□□□□□□□

**OJANG LUTEP TELANGZÜBA # 4000**

**MEIMCHIR TEMENEN NUNGI ALANGZÜKTSÜ MECHI YISU KHRISTA KANGKI NUNG SÜDAKTSÜ**

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai-ar nai-a na asoba anogo ita den tanü nü tia medemdangang (Horoscope) :



**Aries**  
21/3-19/4

Tanü senden nung adentsü aser benjungbentsü nung amungtsü anogo tajung asütsü. Tangari tuyuba angaba ajanga tajangzük angutsü akok. Nikongdang temang nung timtem kar ataloktsü akok.



**Taurus**  
20/4-20/5

Tanü nai maginüba yimya kar endoktettsü akok. Temesepba chiyungtsü nung metangshitsü merangang. Moko achirtemi iba yimya endoktsü merangba nung takok angutsü akok.



**Gemini**  
21/5-20/6

Tanü sobaliba maparen kar adoktsü akok. Kima temulung sadoka senzütsü anogo tajung asütsü. Kidangi ainer kar arutsü akok.



**Cancer**  
21/6-7

Tanü temang nung mokokmin kar agi atongtsü akok. Memenudang teyari bushiba ajanga timtem nungi kümzüktsü. Tanga mapang dang nungi tanü tesüngjemba alitsü merangang.



**Leo**  
23/7-22/8

Tanü ner tanurtem tashimait kar nai achitettsü. Tanur dak aliba yimya tamajung metongshitsütsüba ajanga tarutsü nung parnok metsükdaktsü.



**Virgo**  
23/8-22/9

Tanü nai jangra aliba temeleshi kar agitettsü. Meyimlaba nisung kar ajungbena ajurutsü akok. Nü taküm jenjang tajungba küma ajungketba ajanga tangari na saputsü akok.



**Libra**  
23/9-22/10

Tanü nü dak aliba sempet sayutsü anogo tajung asütsü. Lokti mapang aika nung shilem agitsüsa akümmtsü. Temesepba chiyungtsü nungi pila alitsü merangang.



**Scorpio**  
23/10-21/11

Tanü ya puraputettsü anogo tajung asütsü. Nai akhi yimya ama melinütsü. Business nung bilemdanga inyakba ajanga tajangzük bener arutsü.



**Sagittarius**  
22/11-21/12

Taoba mapang tenzükba mapa kar tanü takok ngua tembangtsü akok. Business ajungba ajanga tarutsü nung anisüngzüktsü. Kinünger den mangatettep ajak tembangtsü merangang.



**Capricorn**  
22/12-19/1

Tanü ya tembar ajurua sensak asemtsü anogo tajung asütsü. Tangari nü dak kodanga manguba jakla kar temai adoktsü akok. Kümmdanga aliba ajanga tepela angutsü.



**Aquarius**  
20/1-18/2

Tanü shisa bulu kar ajanga mepelatettsü akok. Nü taküm nung temelenshi kar adoktsü akok. Na yarirtem mamadoktsü merangang.



**Pisces**  
19/2-20/3

Tanü nü temang nung tashi ajema akümmtsü. Business maparen khen anena ali tajungba asütsü. Tanü na kanga anisüngzüktsü nungdaker.

## TEMANG ANEMALIBAREN

### Anogoshia ghonda kaka aseмба ajanga arishi atsülangtsütsü akok

Taoba mapang bushisüngdang ka ajanga ngutetba agi, aseмба ya exercise tajung rongnung ka lir, ta asatetogo, kechiyong iba ajanga temolungjang tashidak, cancer, blood pressure ajemdaktsür aser temang seret tajemba kümmdaktsür.

Tawa bushisüngdang tasen ka ajanga ngutetba agi, teti aseмба aliba nisung, masemer dang nungi küm 3 agi talangba arishia alir.

Tanga tongutetba balala asadanga exercise balala agiba ajanga teyari aser tajangzük agütsüba aser item rongnung aseмба ajanga koda tali tajangzük agütsür, aji bushisiteta lir.

Cycle anishiba aser jajaba naprongla arishi atsülangtsüba nung sendaka lir, saka item dak nungi aseмба ajanga jenjang tera temaba nung tali tajangzük agütsüba bushisüngdangertemi ngutetba sangdongogo. Parnoki asadanga nung anogoshia ghonda ka aseмба ajanga nisung ka arishi alitsüba nung ghonda 7 shi bendenloktsür.

Data balala parnoki bendenba ajanga sayuba agi, aseмба kija ajanga arishi atsülangtsür ta masü, saka shirnok teti aseмба alir parnok arishi talangba alir ta ngutet.

Iba ya kechiba? ta asadanga item nisungtemi taküm anema alitsü asoshi yimya agi moko machir, yi majemer aser temang serrt jenjang shitak nung ayutsü asoshi meranger. Item ajak kuli balala liaka aseмба ya exercise rongnung tajungtiba ta bushitetogo.

Maneni aseмба den kulemi tanga exercise agirtemdak tashidak balala ajanga anojungi tasüba ajuruba aibenbo mataloker. Aseмба aser tanga exercise meyoktepa agibajisa tajungtiba, ta bushisüngdangertemi metetdaktsü.

Aseмба ya exercise tajungtiba lir, ajisüka 'orthopedic' mesüra tanga tashidak kar atemaba asemtsü nokdang.



(Source - Internet)

### Q. Sorkari Nagaland nunga nashi metepsettsü aser nashishi mayoktsü atema tenokdangba agütsü nunga koma süla?

Iba ozüng ya Nagaland nung tenzükra nibo joko nashi shiji tazü dang achi tenzüktsü....

-SMS

Naga nunger ajak ya Hindu nunger masü.

-SMS

Nashi shi mayoktsü nokdangyonga tajungba dang adi. Saka aji nokdang nung ak shi kg nung 200 agi alia chia aliba ya second nung 400 küma adoktsü.

-SMS

Naga nunger janu rongsen meimer kar RSS Modi Army ta sür nashi dang ojar alirtem jakibu mulungtiku saka asen Naga nungeribu momolungtsusa

-SMS

Kobi meli Naga nunger BJP pur dang jaki center nungi ozüngsüa nashi dang 'gau mata' ta jaa külemang ta arutsü parnokibo nokdangti asütsü saka Naga nungeri memolungtsü.

-SMS

Tang Nagaland Sorkar yagibo tenokdangba agütsütsü ati kechiaser yamaji nokdanga sayu nungang Center sorkari sen tali lemzüktsütsü aser juli tera masüng aliba süngadoktsü saka Naga nunger asoshibo nashi metepsettsü ozüng agütsür nisungji ka kenü ka kenü ta tepseta ayoktsüsa akümmtsü ati.

-SMS

Yamaji ka asünungbo, Nagaland nung nashi ajakji Hindu nunger nem metsüdaktsütsüla, aser nashiji ka danga yareta mesüra shiranga tanga südaktsüra, parnoka life jail-i yoktsüla.

-SMS

Nagaland nung nashishi mayoktsü aser machitsü tenokdangba agütsü nungbo, Naga nungeri nisung shi achi tenzüktsü ana nung dang lir.

-P.R. Hill Kohima

Nagaland nung nashi metepsettsü aser nashishi mayoktsü atema tenokdangba agütsü nungbo. Nagaland nung B.J.P. party supporter ajak tepsetter nashishi melen Bazar nung yokla, aser Naga nungeri aji alia achitsü ana nung lir.

-Meren Kohima.

Nagaland sorkari nashi metepsettsü aser nashishi mayoktsü tenokdangba ozüng agütsü nungbo tawa atalokba lendong dang nungi tuluba ataloklati.

-Imo Jamir, Dimapur

Sorkari Nagaland nung nashi metepsettsü aser nashishi mayoktsü ozüng tenokdangba ozüng agütsü nungbo tawa atalokba lendong nungi tuluba atalokla kechiba süra nashishiji asen Naga nunger sobaliba chiyongtsü tongtipang ka lir.

-Imo Jamir, Dimapur

Nashi metepsettsü, Nashi shi machitsü tenokdangba arunung Naga nunger Cancer tashidak nungi kümzüktsü, sen aika rizungtsü, Ak shi agi matitsü, Nashi metepsettsü nokdang telokji zükreptsü ta asütsü ati...

-SMS

Hindu masü ajibo Naga nunger mezüng meshipa mapa ka asütsü. Anungji takok tashi asen Naga lima kümzükka ayutsu BJP party ya maruang tajungba ta danga no.

-SMS

Ozüng yanglura ano tatsüka lirbo asenek ya sentepi masü Hindu nunger tekülemdaki dang oang ta asütsü ana nung dang lir.

-Shilu Pongin. Dmr

(Maneni tapak 11 nung...)

## TAN HOPTA ATEMA - KOMA SÜLA ?

### Q. Nagaland nung national aser state highways ya PWD-i masü private company - tem nem repringdaksü nunga koma süla?

Olong 20 shi nung April 21, 2017 tashi nung iba telangzüba ya onok dangi e-mail - tiryimyim@gmail.com mesüra SMS - 9856121232 / 9436072422 mesüra Tir Yimyim Facebook account ajanga yokang. Telangzübatemji taruba Hokolbar nü adoktsütsü.

## Cricket asayar Andre Russell-i Bollywood nung shilem akok



**Mumbai, 15 2017 (Agencies):** West Indies nunger cricket asayar Andre Russell international music video ka sayatsü asoshi renema lir aser pa ano Bollywood nung shilem agitsüa akok.

"Ni 'performing arts' nung career yanglutsü asoshi

asadangdar. Taküm kü indang mezüngbuba international music video ka sayatsü aser iba ya India nung tali rangloker inyakdar. Bollywood film temnunga shilem agitsü asoshi bilemdangdar," ta Honibarnü pai ashi.

Iba music vedio ya Los Angeles nung amenoka aliba

Gemini Musiq-i produce asütsü. Iba production company ajanga Justin Bieber indang kensep 'Sorry' produce süa liasü. Russell-i pa indang music video mezüngbuba parnok teyari ajanga taküm sayatsü.

West India nungi cricket asaya nung all-rounder Dwayne Bravo-i Champion, Jaegerbomb aser Trip abhi baki hai kentem sayaba sülen tang Russell-i music video ka sayatsüba lir.

Russell pai jangraba mapa inyaksü asoshi Indian actress Mallika Sherawat-i San Antonio, Texas nung tasa aser tajungshiba agüja liasü. Project ka nungbo dena külemi shilem agiba angutsü akok.

Venus Entertainment Group ajanga Russell achaayangtsü.

## 'Lion' film agi Kim Kardashian ajeb



**Los Angeles, April 15 (Agencies):** "Lion" film agi alima nüburtem ajak mulungjang nung kongshiba sülen ano tang reality TV nung shilem agila Kim Kardashian mulungjang nunga kanga kongshiogo.

Arishi küm 36 tain, Kim-i, Garth Davis-i direct asüba film agi ni jebdaksüogo, ta Twitter ajanga ashi.

"Ni Lion film reprangogo aser iba film yagi ni ghonda ishika jebdaksü. Naia iba film ya mereprangi lira reprangang,"

ta Kim-i tweet asü.

"Lion" film ya Saroo Brierley ta ser Australia nunger otsü lir. Film nungji pai Google Earth amshia kibong den ajuruteper. Pa ya par kibong denji India nung pilaba liasü aser Saroo Brierley indang shilemji Sunny Pawar-i agia lir.

Film tenzüker ghonda 5 shibo Sunny shilem kija lir. Pai Calcutta nung samasang arishi küm 5, Saroo shilem agiba yangji kanga jangja angutsü.

Iba film ya Sunny-i shilem agiba mezüng film lir.

## Arishi küm 13 kar smartphone addict akümba atema yaridar

**New York, April 15 (Agencies):** Technology amshitsü yimya kanga mejungi sübaa temang nung tashidak ka amai akümba jenti kümogo. Tang ya US nung tanur arishi küm 13 tain kar smartphone onsara tali amshiba aser video games teti dang asaya aliba tashidak (addict) jungdangtsüsü atema yaridar, ta osangbenertemi ashi.

Alima anüolen tesem nung iba amala tashidak yariba tesem kaji Seattle ansa aliba reSTART Life Centre kija ya lir aser yangji digital technology balala agi addict kümer aliba lanurtem

yarir, ta Hokolbarnü osangbenertemi metetdaksü.

Yangji arishi küm 13 nungi 18 pur tashi yariba tesem dang Serenity Mountain ta ajar.

"Tanur nem item electronics osettem amoktsüba ajanga parnok tebilemba melenshidaksür, kechiba süra item oset nung arakzüba, sentsü aser ola adokba jagi parnok pu-er aser parnok dak aliba shitakba yimyattem nembanga yutsür," ta reSTART Life Centre nguteter Dr Hilarie Cash-i ashiba osangbenertemi metetdaksü.

Item addict kümer aliba tanurtem ya shilem balala lemsar anepalur.

"Hopta 8 nungi 12 tashi nung iba lanur aser par kibong yimyattem kanga junga asayadanga putettsü meranger," ta restart-i ashi.

Iba mapang par kibong nung digital amshiba yimya asadanger aser ibaji mozü koba agi taneptsü angutsü itemji putettsü asoshi inyaker. Karbo ita 12 tashi amungtsüsa akümer.

Smartphone onsara tali amshiba ajanga nija taküm, lokti aser pei mapa inyakba tesem nung timtem aika adoker, ta Information Systems Journal-i nung shia lir

## LG G6 April ita India nung sayatsü

**April 15, 2017:** Taküm Mobile World Congress Barcelona nung amundang LG company-i LG G6 sayua liasü aser ita ana tsünga nung iba phone India nung iba ita tatemi sayatsü asoshi sentong lir. LG G6 ya yaküm sayaba LG G5 phone den tatongtep phone lir.

Company osang ka ajanga ashiba agi, LG G6 India nung April ita tatemlen sayatsü. iba phone sayatsü mapang kanga dang tesütep asütsü südi, kechiyong Samsung-a parnok indang phone S8 aser S8+ India nung April 19 nü sayatsü asoshi renema lir. parnok den toktepa LG-i iba phone India nung sen

jenjang 49,999 yong sayatsü akok. Iba phone anaprongla ajanga kati ka nem shishilembadak tetoktepba agütsütsü. Taoba mapang India nung Samsung phone tem tajungba yokya liasü saka yaküm Note 7 phone nung timtem adokba ajanga nüburtemi Galaxy S8 madak LG G6 shimtsü akok.

LG G6 ya tozüker gram163 aser tasazük 148.9 x 71.9 x 7.9 mm lir. Iba phone nung 16M colours aser Gorilla Glass 3 protection dena 5.7-inch IPS LCD capacitive touchscreen keta lir. Tesülen panel ji Corning Gorilla Glass 5 lir.

Maneni phone nung Android 7.0 Nougat OS, Qualcomm MSM8996 Snapdragon 821 processor aser 4GB RAM keta lir. Samsung Galaxy S8 nung Qualcomm processor keta lir saka India nung parnok indang Exynos processor inoker ayoktsü. Iba ya Qualcomm processors sapurtem atema tetsükdangtsü ka asütsü akok.

LG G6 nung ano tesülen camera Dual 13 MP (f/1.8, OIS, 3-axis, phase detection AF) + 13 MP (f/2.4, no AF) aser selfi aser video calling atema tejaklen camera dual-LED flash aser 5 MP, f/2.2, 1080p inoka yanglua lir.

## CBFC züngsemtem tsünga tangatettep ka alitsüla: Sonakshi Sinha

**New Delhi, 15 2017 (Agencies):** Central Board of Film Certification (CBFC) ajanga Noor film nung journalist Barkha Dutt tetshia aliba melenshitsu asoshi tetuyuba agütsüba sülen, film nung tongti shilem agila Sonakshi Sinha-i ashiba agi, censor board-i film tem asadanga yimya nung inyakyim telatet ka alitsüla.

Noor film nung Sonakshi, Barkha Dutt sapur journalist ka ama shilem agir, saka CBFC ajanga film yanglurtem dang 'Dutt' tenüng melentsü asoshi tetuyuba agütsü.

"Censor board-i film ka asoshi meshidakba shilem kaji film kar asoshibo shitak asütsü akok ta parnok tsünga telemtetba kati arutsüla. Parnoki film asadanga yimya kanga memedem, anungji tamasa parnok tsünga



angattettsüla." ta Sonakshi iba ken o dak sendakba nung asüngdang dang osangbenertem dang ashi.

Iba film ya Sunhil Sippy-direct asü aser Saba Imtiaz-i züluba Pakistan nunger otsü kaket ka nung ajemdaker yangluba film ka lir.

Iba kaket otsü ya Karachi nung alir arishi küm 20 tain osangbener Ayesha Khan dak ajemdaker züluba otsü ka lir.

## Zuckerberg-i yaküm Facebook Stock billion 1 dak tali ayok

**April 15, 2017 (Agencies):** Facebook ajanga tawa osang agütsüba nung, Zukerbeg-i taoba kümtem nung billion \$1 dak tali alang Facebook stock ayokba metetdaksü. Pai iba ya Chan Zuckerberg-i achayanga 'philanthropic investment vehicle' tasen ka yangluba nung yarisemtsü asoshi inyak.

Kasa osang ajanga ashiba agi, Zuckerberg indang share million 9.6 agi küm ka tejakdang aliba dang nungi tajemba kümogo. Hokolbarnü Facebook 'closing share price' osang ajanga item share tem billion \$1.3 tang nungi timba

asütsü ta metetdaksü.

Chan Zuckerberg Initiative ya 'philanthropic investment vehicle' ka lir koba Zuckerberg aser kinüngtsü Priscilla Chan nati par jala asoba sülen 2015 küm sangdonga liasü. Iba sentong ya taruba küm 10 tsünga nung billion 3 indoka tashidak ajak anepdaksütsü merangtsü asoshi bushisüngdanga yaritsü atema tenzük.

Stoke tem paikaji yokaka Facebook nung Zuckerberg indang share shilem 59.7 lir. Forbes ajanga sangdonga agi, Mark Zuckerberg ket nung rongsen billion \$58 dak tali lir.



Pei linük nung tobur tajungtila toktepba nung takok ngur alirtem, International supermodel temi 'Save the Girl Child' & "'Stop Violence Against Women' sentong nung shilem agiba noksa nung angur. Iba sentong ya 'Rubaru Group'-i Honibarnü New Delhi nung ayonga amung.





Rampur (Uttar Pradesh), April 15, 2017: Honibarnü Lucknow-i aoba train, Rakya Rani Express train Moradabad Divisoon kübok Rampur nung Koshi apo anasa tsükoka aliba noksa nung angur.

## EVMs nung tamang makateter, ballot amshitsüla: Akhilesh

**Lucknow, April 15 (Agencies):** Honibarnü taoba Uttar Pradesh Chief Minister aser Samajwadi Party tongti, Akhilesh Yadav-i, electronic voting machines (EVM) dak tamang mekateter, anungji tarutsü nungbo election mapang ballot papers amshitsüla, ta ashi.

Lucknow nung osangbenertem den jembidang pai, "EVMs nung kodang timtem adoktsü mesüra software agi mapa meinyaktsüar aji shingaia memetet. Gol dak tamang katettsüsa masü. Onoki EVMs nung tamang mekateter," ta ashi.

"Onoki ballot papers nung noklang shilem nung tamang akar, aser tarutsü mapang nung elections nung ballot paper

amshitsüji onok takhangba. EVMs ji jungaka mesüra mejungaka onoki ibaji maginer," ta paisa ashi.

Akhilesh-i ashiba agi, BJP-i sorkar akumba ajanga nüburtemi parnok ashioktsür ama bilemer.

"Kin aser tamangba yimsü nung ajemdaker tesempa proka election agi. Kin aser tamangba yimsü nem tajangzük agutsütsü ta nangzuka votes angu," ta pai ashi.

Akhilesh-isa par party indang ita ana membership sentong tenzüksüogo.

"Iba membership mapatong ajanga onoki SP sorkari inyakba mapatem sangdongtsü," ta paisa ashi.

Yogi Adityanath-i aniba sorkari state nung aliba district headquarters ajak nung light ghonda 24 agutsütsü, Bundelkhand nung ghonda 20 aser yim ajak nung ghonda 18 agutsütsü nangzükba dak sentakba nung Akhilesh-i, tang agütsüba light power ya SP sorkari tenzükba power sub-stations, transformers aser distribution lines ajanga agütsür; onoki power sector nung aika inyaktetogo, ta ashi.

SP lenirisa, BJP sorkar anema jembitsü atema ano mapang matong, ta ashi.

"BJP sorkari budget benokba aser schemes inyakba mapang nung ang onoki parnok anema nokdaksü," ta pai ashi.

## Odisha nung anogo ananü BJP National Executive senden tenzükogo

**Bhubaneswar, April 15 (Agencies):** BJP indang anogo ananü National executive senden Honibarnü Odisha yimtiba, Bhubaneswar nung tenzükogo, aser iba senden nung Ato kilonser, Narendra Modi densema bangdak lenirtem aika dendar.

Ajisüaka iba senden nung External Affairs Minister, Sushma Swaraj bo temang manemi aliba ajanga medenteter, ta Union Minister of State for Petroleum & Natural

Gas, Dharmendra Pradhan-i metetdaksü.

Hokolbarnü BJP-i, Ato kilonser Modi-i Odisha ya sensakertem atema schemes asoshi laboratory asütsü lemtetogo, ta metetdaksü.

Union Petroleum & Natural Gas Minister, Dharmendra Pradhan-i, "Odisha nüburtemi Ato kilonser, Modi agizükter, joko nüburtemi BJD dang jashir. Nüburtem melungjang melenshiogo, aser ibaji Panchayat election nung nisung aikati BJP nem vote agutsüba ajanga sayur," ta ashi.

BJP-i aniba NDA sorkari

tesüiba küm asem tsungda Odisha nung railway terenlok atema sen crore 5,200 lemezükja liasü. UPA yimsüsüba mapang nungbo railway budget nung Odisha nem sen crore 1,000 dang lemezükja liasü, ta Pradhan-i ashi.

Paisa, Odisha nung yimsüngtem nung terenlok atema Centre-i sen crore 3,000 lemezüksüogo, ta metetdaksü.

Odisha nung Lok Sabha menden 21 nungi BJP nungibo MP ka dang lir. Ano menden 147 aliba Odisha Assembly nung BJP züngsem 10 dang lir.

## Maharashtra tzüym nung Engineering kaketshir 8 arakset

**Bengaluru, April 15 (Agencies):** Honibarnü Maharashtra state kübok Sindhudurg district nung aliba Vayri tzüymkülen Arabian tzüym nung Karnataka nung aliba engineering college ka nungi kaketshir ti arakseta süogo, ta police-i metetdaksü.

Belgaum nung aliba Maratha Engineering College nungi kaketshirtemji tzüwatsü atema tzüyimi oa liasü.

Südoksenemi aoer kaketshir parnok 47 nungi asürtemji tetsür asem aser tebur pongu liasü.

Parnok rongnung nisung 30 tzü awai ao, aser parnok rongnungi nisung asem kümzük aser nisung 19 tzü wadanga tzükümi arutet, ta police-isa ashi.

Iba tatalokba ya tanü nikongdang Malvan jila anasa Vayri tzüküm nung atalok.

"Tzüsemlu liasü saka kaketshirtemji tzü awai tzüyimi ao. Nisung kar araksetba ngur par telok nungi kar parnok kümzükü ao saka idangjibo kanga menor liasü," ta police-isa ashi.

Tetsür asem densema tasümgang ti ngutetogo, ta parnokisa ashi.

Osangbenertem den jembidang Sindhudurg Superintendent of Police, Amogh Goankar-i, "Kaketshir asem tasü-taküm na tsungda tzüküm tonga anir aru. Nisung ana Malvan nung aliba hospital ka nung lir aser tetsür ka Oros nung aliba hospital ka nung lir," ta ashi.

Yaküma February ita nung Pune nung aliba college ka nungi Mumbai anasa Murud tzüymkülen nung kaketshir 13 arakseta süa liasü.



Ahmednagar, April 15, 2017: Honibarnü Ahmednagar nung Tir, Pranab Mukherjee-i Armoured Corps Centre and School Ahmednagar nem President's Standard agütsüba noksa nung angur.

## Taoba J&K CM Farooq-i Srinagar by election nung takok angu

**New Delhi, April 15 (Agencies):** Taoba mapang Jammu & Kashmir Chief Minister aser National Conference (NC) tongti, Farooq Abdullah-i Srinagar by election nung takok nguogo. 2014 küm pai iba constituency nungi tamakok ngua liasü.

Abdullah-i PDP candidate, Nazir Ahmad Khan madak vote tali 9,000 agi takok angu.

Abdullah-i 2014 küm PDP candidate, Tariq Karra matsüngdang tamakok ngua liasü. Karra-i PDP nung anenba sülen iba menden azüngteta liasü, iba sülen pa Congress nung aden.

April 9 nü mezüngbuba by election agidang longkak aiterem aser security sepaitem raradang nisung ti asüba ajanga iba election anogo thinener liasü. Iba sülen Brihostibarnü election agi saka vote shilem 2 dang agütsü. State putiotsü

nung vote tajemtiba agütsüba anogoji iba anogo liasü.

Iba menden atema candidates ajak agi parnok 9 toktepa liasü.

2014 küm Lok Sabha aser assembly election ama masü saka Brihostibarnü election nungbo yimti lenmangtem kanga azüngmeyaka liasü.

Polling stations 18 nungbo vote agütsür shinga maliasü aser polling station 4 nungbo vote kaka dang agütsü. Ajisüaka Brihostibarnü mepetmesü kecha matalok.

Iba election nung Congress-i Abdullah nungita liasü aser iba anogo nung vote agütsürtem longsoa maruba atema parnoki state sorkar aser Election Commission nem tai tongloksü.

Vote agütsür kati ashiba agi, RSS tashii marudaktsütsü atema separatists teloki election nung shilem magitsü nokdanga liasü.

Tang state nung BJP-PDP teloktep sorkar lir.



Chennai, April 15, 2017: Honibarnü INS Chennai rong Chennai nung rong anendak tesem tonga aruba mapang kaketshirtemi agizükba noksa nung angur. INS Chennai (D65) ya Indian Navy indang missile raksatsüba rong lir. Iba rong ya Mumbai nung aliba Mazagon Dock Limited-i yanglu aser 2016 küm November 21 nü semzükja liasü.

# North Korea-i US nuclear agi amaktsü koka lir



April 15, 2017 nü Pyongyang nung North Korea ngutetsang Kim Il Sung North sor küm 105 jungmung nü North Korea lenir Kim Jong Un (Achiji)-i military parade nung shilem agirtem nem teka ayiploksüba noksa nung angur.

**Pyongyang, April 15 (Agencies) :** Honibarnü North Korea-i US dang par tesemlen parnok jashitsüsa mapa kecha teinyak, ta metetdaksüogo.

Iba mesükba mapa inyakra nuclear amshia amaktsü, ta parnokisa ashi.

Parnoki iba temetetsü ya North Korea linük ngutetsang aser tang linük lenir Kim Jong-un tebou, tesüiba mapang Tir, Kim Il-sung sor küm 105 jungmungnü metetdaksü.

Pyongyang nung parade tulu ka ayonga agi aser iba mapang Kim Jong-un ano nuclear tasen tendangtsü tetuyuba agütsütsü imlaa liasü, ta osangbenertemi ashi.

Parnoki iba anogo nung intercontinental aser submarine-launched ballistic missiles (SLBMs) tem sayu. Item missile rongnung karbo

kilometer 1,000 tashi aoba dena liasü.

Ano parnoki sayuba missile rongnungjisa intercontinental ballistic missiles tasen tapu ana dena liasü, ajisüaka item missile anaji tendanger aser medendanger mejangjatetter, ta mongintemi ashi

US indang tayimtsütem North Korea tesemleni nunga aruba ajanga parnoki North Korea tashi sayua liasü.

"Onok den raratsü purtem den onoki raratsü kanga junga renema lir," ta North Korea nung kettangser tashi taittiba rongnung tanabuba ta züngshia alisang, Choe Ryong-hae-i ashi.

"Onok nuclear agi amaker dak onokia nuclear agisa meyipba amaktsü renema lir," ta paisa ashi.

Noklang nok amba sepaitemi Kim Il-sung asoba

anogo nung (Day of the Sun) Pyongyang nung aliba Kim Il-sung square nung shilem agi aser lenir Kim Jong-un tanak sobutsü sobur repranga liasü. Pa iba sentong reprangdang teka madena aser menürema repranga liasü.

"Raraji mashi mapang ka nung adoktsü aser rara nungji takoker malitsü," ta Hokolbarnü China Foreign Minister, Wang Yi-i ashi.

Tan iba parade nungbo tesüiba mapangtem nung ama China nungi shinga dena malisaü, ta osangbenertemi metetdaksü.

Brihostibarnü US Tir Donald Trump-i, "North Korea tebilemstüji kokttetsü," ta ashi.

"China-i yaritsü mulungtet nungbo kanga junger asütsü, ajisüaka parnoki meyari yonga onoki inyaktetsü," ta US-i ashi.

# China-i Pakistan nem 'maritime patrol' rong tasembuba tongtsüogo

**Beijing, April 15 (Agencies) :** China-i Pakistan nem patrol rong 600-tonne, tasembuba Linük indang tzü nung inyakyimtem kümzuka ayutsü asoshi iba rong tongtsür.

China Shipbuilding Trading Company Ltd

(CSTC) aser China State Shipbuilding Corporation (CSSC) Xijiang Shipbuilding Co Ltd nung yangluba rong ya Guangdong province kübok Guangzhou nung agütsütep.

Tesüiba mapang agütsüba rong ana jagi inyakyim ajunga

nung kanga junga teyari agütsür aser balakata lokteper exercise agiba mapang mesüra tzü lendong nung teküzmzüker mapa kanga tashi ita inyaktetba agi iba rong dak temulung kanga alemer, ta Pakistan osangkaket nung shia lir.

Pakistan maritime authority-i item rong ajungba atema aser China nung rong yanglurtemi parnok den angatettepa inyakba asoshi kanga pelaba metetdaksü. Rong ayokba sülen ano China-i yanglushiba mapa nung yaritsü nangzüka lir.

Item rongtem ajanga China-Pakistan Economic Corridor (CPEC) tali tashi itshir aser linük ana tsüngda tesendaktep akangshir, ta kasa osangkaket nung shia lir.

CPEC project ajanga Pakistan kübok Gwadar yimti aser China nung Xinjiang yimti na tsüngda gari lenmang aser train lenmangtem agi sendakteptsü. Iba project ya 2015 küm sen US dollar million 46 agi tenzüker ajisüaka khen lir ano sen US dollar million 55 kuma yanglushi.



April 15, 2017 nü Afghanistan, Nangarhar province kübok Achin district nung US-i amakba sülen mita aoba mapang ngutetba rocket raksa tila ka Afghanistan police kati amer aliba noksa nung angur.

# Afghanistan: Bomb lendong nung nisung 11 asü

**Kabul, April 15 (Agencies) :** Afghanistan kübok Helmand province nung bomb lendong atalokba mapang tajemba agi civilian 11 tashi süogo, ta Honibarnü kettangsertemi metetdaksü.

"Hokolbar aonung Nawa District nung Civilian tem mena aliba minibus ka agi improvised explosive devices (IED) ka nung oa tsükshi. Iba bomb lendong nung gariji anüka ajasa aser yangji mena aliba nisungtem asü," ta kettangser

kari ashiba osangbenertemi metetdaksü.

Taliban kiralongrartemi item IED ya security tem amaktsü asoshi amshir, ajisüaka iba oset yagi civilian tem kanga yirutsür.

Afghanistan nung tasüba timtiba atalokba rongnung tasembubaji IED ajanga asüba ya lir aser ali nungi raraba aser taküm bendanga agütsürtemi südaktsübaji mezüng aser tanabuba jenjang nung lir.

Helmand ya Taliban tem indang tesepti tesem ka lir.

# Syria: Yim azüngteta yutsür aoba gari amakdang nisung 22 asü



April 15, 2017 nü Syria army aser sorkar anema rarartem tsüngda al-Rashideen, Aleppo province nung tenangzütep ka agiba sülen al-Rashideen, Aleppo province, Syria Kefraya aser al-Fouabus yimtsüngtem azüngtetadaksür yangji aliba nüburtem anir aoba bus garitem anasa Sorkar anema rarar ka nokdaka aliba noksa nung angur. Item yimtsüngtem azüngtettsü tenangzüktep agiba sülen Honibarnü Aleppo-i aitsü aliba garitem nung bomb ka pokloksüdang tajemba agi nisung 22 asü aser aika yiru.

**Damascus, April 15 (Agencies) :** Honibarnü Aleppo, Syria nung yim azüngteta yutsür aoe garitem nung bomb pokloksüdang tajemba agi nisung 22 asü aser aika yiru.

Osang ajanga ashiba agi, sorkar anema rarartemi amanglemer aliba Rashideen tesem nükjidong sür pokloksüba bomb jagi nisung 48 yiru.

Iba bomb ya Shia nunger yimtsü ana azüngtetba nüburtem adenshiba tesem nung taküm bendanga agütsür kati pokloksü. Iba nisung jagi truck gari ka anir arua iba bombji pokdaksü.

Shia nunger nisung 5,000 aniba bus garitemji sorkar kübok aliba Aleppo tesemi belener aotsü asoshi temelaba tejangja atatepa lia iba lendong atalok.

Sorkar aser sorkar anema rarartem tsüngdai Iran, Turkey aser Qatar linüktem tiyongi aita lemtetba inyakyim ya sorkar anema rarartem kübok aliba Shia jila aser yimtsütem nungi nüburtem kümzuka anitettsü asoshi renemba lir.

Iba melena Madaya aser Zabadani nung aliba sorkari anema rarar kibongtem sorkari

Idlib province-i yoktsü nangzüker liasü.

Item yimtsüng azüngtetba maparenji Hokolbarnü nungi tenzüker, ta osang ajanga ashi.

Shia nungerji sorkar anema rarartemi amanglemer aliba Rashideen jila tonger liasü aser sorkar anema rarar kibongtemji sorkar kübok aliba Ramouseh, Aleppo tonger liasü.

Anatsülen nungi aruba garitemji apusotsü lia Rashideen nung aliba sorkar anema rarartemi takhangba tasen ka agüja Shia nunger mena aliba garitem sota ayu aser parnok garitemjia Ramouseh nungi marakzüi liasü.

Shia nunger anir mao tsüngda Kafraya aser Foa nungi Shia nunger atema rarartem tama atsüngindakjang ta sorkar anemertemi takhangba ka agütsü, ajisüaka iba takhangbaji mataloktsü.

Yamaji atatepba mapangji temang nung timtem alir nisung asembo süadok, ta tenük kuli angur kati ashi.

Pai, chiyungtsü aser tzü junga chia mejemi ghonda 24 tashi bus nung aliba mapang tetsür asem tashi bus gari telung nungji tanur aso, ta ashi.

# Manipur nung ...

(TAPAK 1 NUNGI...)

Jayentakumar-i Dr Rajo, family welfare director nem interim Health Director inyakdaksünüa ashi saka ibaji magizük. Külen, pai Law Minister mapa bena liaka, Biren Singh-i Advocate General ka shimdang pa den asüngdangya mesüi shimba atema mepelai liasü.

Chief Minister-i iba nisung ana shimba ya agienra, Jayentakumar-i maneni minister ka ama inyaksü mulungtsü akok.

Jayentakumar-i mapa nungi anenba shidi züluba nung, Chief Minister-i pa ministry nung züngokba atema pelar, saka pa nem lezmüksüba mapa nungi meinprongba ajanga pai alizüng ayuba tonga meinyakter, ta shia lir.

Maneni, Uripok nungi NPP MLA, Y. Joykumar-ia chief minister den mepelaba osang kar angazüker.

Joykumar ya taoba Director General of Police ka lir aser pai tang Deputy Chief Minister mapa bena lir. Pai Home portfolio aginüa liasü saka Biren-i iba mendenji shinga nema magütsüi dang pai bena lir.

Manipur nung BJP-i aniba teloktep sorkar nung March 15 nü BJP, NPP, Naga People's Front (NPF), LJP aser Congress (party melen) nungi MLA 9 tashi minister menden nung shim. Iba sülen March 23 nü Minister 3 aser Parliamentary Secretary 12 shimlok.

# IITs nung tetsür ...

(TAPAK 1 NUNGI...)



Iba luden jagi taküm küm tetenzüklen, IITs nung menden ajak nungi tetsür nem supernumerary seats noklang nung shilem 20 agütsütsü tebilemba ka shidang.

Tanü JAB senden amendang iba tebilembaji benoka olemtep aser parnokki mulung agizük, ta HRD ministry ketdangser-isa ashi.

"Kümshia supernumerary menden indang shilemji repringshitsü. Menden teimba akümba ajanga teburtem asoshi lezmükja aliba menden nung timtem majurutsü aser temelenshiji küm 8 atema dang asütsü. Maneni, tetsürtemi yutsüba menden nung tetsürtem dang shimoktsü" ta paisa shisem.

## 10th DEATH ANNIVERSARY

Late. TALIKOKBA (1929-2007)

Nai onok toktsür tanü küm ter abensar' Nai onok meimba mapatem onok mulungjang nung tasensa lir, Na meteterem ajak asoshi naji tasü aser tashi itdaktür liasü. Onoki na menguaka, Na onok mulungjang nung teti alitsü Onoki na meimer aser kanga menungrar.



ASÜ : 16-04-07

## METETDAKTSÜR

Lakhuni Senso Mungdang 2<sup>nd</sup> May 2017, 9:00 ako nungi alitsü. Anungji senso sanger sungpu nungi tema ajak arua adentsü metetdaksür. Marurtem temzüng nung aliba ama merenshitsu.

Sd/- **A.Bendangningsang** President  
Lakhuni Senso Mungdang

Sd/- **Tekatemjen** Secretary  
Lakhuni Senso Mungdang

## OFFICE OF THE LIROYIM VILLAGE COUNCIL

P.O.Changtongya, BPO Liroyim Model Village  
Dist. Mokokchung: Nagaland-798613

### PELABA METETDAKTSÜR

7th April 2017 anogo nung Longjakrep Women Welfare Society ajanga ozü Liroyim nung Diabetes Awareness aser Screening Camp den külemi Doctor tajung anir arua tanga treatment aser mozütem angati agütsüba atema ozü yimtsüngi kangasa pelaba metetdaksür. Iba sentong nung item item lenirtemi shilem akia liasü:

- Dr. Hiteswar Saikia**  
MBBS MD (DIB)  
P.G.D.H SC-Diabetology (Chennai)  
P.G.C- Diabetology, Boston, USA  
Asst. Pro-Jorhat Medical College
  - Mr. Bhaity Pegu**  
Lab Technician, Jorhat Medical College
  - Longjakrep Women Welfare Society Chairman aser membertem.**
- Sd-  
**MR. IMTINUNGSANG,**  
Chairman,  
Liroyim Model Village.

## Q. Sorkari Nagaland nunga nashi metepsettsü aser nashishi mayoktsü atema tenokdangba agütsü nunga koma süla?

(TAPAK 7 NUNGI...)

Tang sorkari nashi shi metepsettsü aser mayoktsü ozüngji yanglura chief minister pai anir asen Naga nungerji Hindu nunger akümtsü ana nung dang lir.

-Odi Kma.

Iba onük yabo BJP Nagaland pur dang tama langzüdaksü nung tang ajungtsü. Kechiyong parnok ya nashi külemer party-a.

-SMS

Naga nunger chanu rongsen meimer kar RSS Modi Army ta sür nashi dang ojar alirtem jakibo mulungtiku saka asen Naga nungeribu memolungtsüsa.

-SMS

India nung RSS teloki mulungba ozüng nung alitsssa akümtsüji arema atatsü dak alaka kecha ashitsü makoktsü.

-SMS

Tang arua aliba election nungji asenok Nagaland nunga BJP-i sorkar benra asen Tsüngremjia nashi agi melentsü menua mali aser asenok Naga nungeri aginüba ama India sorkari sen-a aika yoktsü. Anungji electionji dang ata lidi.

-SMS

Sorkari nashi metepsettsü aser nashishi mayoktsü ozüngji yanglura ano kobi meli lenjem ajunga nung nashi sünyanglu yangluang ta ozüng agütsütsü südi.

-Shilu Kohima

NPF aser BJP ajunga Naga lima nungi aridok nung ajungtsü.

-SMS

Ayatai asütsü, telemsa aika adoktsü, sen meimeri sen dang ngulibo Hindu nungeri India nung Hindu aser nashi dang alitsü ta asüba nungji adentsü. Kari onokbo Khristan ta ashitsü. Tsürapur ama asenoki longjemer, tanübo India den meraratetsü. Asen Teyanglur dangi sarasadema khuret bendi ta ayongzüker.

-T. Bendang Jamir Indisen, Dimapur

Article 371 aser 16 point agreement ajanga Naga nunger alakteta balaka ta sayubaji agitsüa shi India lima purapujiba ajak agitsüba Naga lima ya masü. Govtji achitsü adi.

-SMS

## MENUNGRA BILEMTETER

15.04.2017

Nai onok toktsür küm ka tashi aruaka nü den ali ama onoki na mamateter. Nü temeim, menerem jakten, ajemalu yimya onok mulungjang nung teti lir. Aser nai inyaktetba mapatem kodanga onoki amatsü makok.



Asür Akangkokba (Ungma)

Temeim Kinungtsü, chirnur, semchir & kinungertem.

## Pelaba Lemsateper



ASÜR IMNAONEN JAMIR

ASO : 12.09.1923 | ASÜ : 04.04.2017

Ajiang, ni nenok dang tesüngmangtsü miim o ka ashir, asenok ajaki memejangtsü, saka aoksa-a tenük masepsi nung, tatem jangzü ola apudang, asenok ajak melenshitsu. Kechiaser jangzü aputsü aser tasürtem mesamaba nung shia arudaktsütsü; aser asenok melenshitsu (1 Korint 15 : 51-52)

Ozüi kanga meima alisang, kibong nung tekolakba, asür Imnaonen Jamir shiranga aliba mapang nungi tasünü tashi kinungertem, tembartem, kiyongertem, Arogo balala, doctor & nurse tem, village council tem, lokti balala aser yimsüsürtem ajaki maneni temeim agi sarasadem, rongsen, aria bilemba aser nungdakba kechisarena agi ozü kibong nungita yariba atema temulung ajak agi nenok ajak dang kangsa pelaba lemsateper. Pa asüba mapang ana aser talang nungi arua pa nem tatembang akhümtsüba agütsür ajak dang onoki kanga pelar. Ozü asü mangyim mapang onok den yariteper ajak nem Tulusang Tsüngremi mokoroi moajang ta ozü sarasadem.

- Temeim kinungertem.

## OFFICE OF THE LAKHUNI VILLAGE COUNCIL

MOKOKCHUNG : NAGALAND  
P.O. MANGKOLEMBA B.P.O - Alongtaki

### 2017 LAKHUNI MOATSÜ BENJONG MONG SENTONG

Anogo : 1<sup>st</sup> May, 2017  
Mapang : 10 ako  
Tesentepdak : Local Ground

TONGTI TESEMDANGER  
**DR. BENJONGLIBA**  
Honorable Parliamentary Secretary  
CAWD & Taxes agaland, Kohima

SENTONG LENIR

Wb. Z.Meren GB

SARASADEMETSÜ

Wh. Temsu, Pastor

Lakhuni Baptist Church

PELA-A AGIZÜKBA

Wb. M.Longri, Treasurer

Cultural Society Lakhuni

MOATSÜ RATET

Wb. Tekatoshi Ex.Senso President

TAYONGZÜKBA O

[a] Longjemdang Village Council

[b] Changdang village Council

[c] Council Chairman Lakhuni

YARTSÜNGSANG & KENTEN MAPANG

Cultural Society

TONGTI TESEMDANGER O:

MOATSÜ SHIPANG O

Wb.I. Chuchang

Advisor cultural society

TATEM SARASADEM

T.T. Tekariba

## METETDAKTSÜR

Iba Benjong mong nung Lakhuni Senso Sanger ajak pelashisia jaoker.

Sd/-  
**Mr. Lanuyanger,**  
Chairman,  
Lakhuni Village Council

Sd/-  
**Mr. Tekatemsu,**  
Secretary,  
Lakhuni Village Council.

MP Verma Cup nung Nagaland team runners-up asü



Tesüiba mapang India nungi cricket asayartem, Dilip Vengsarkar, Surinder Khanna aser CAB general secretary, Aditya (achiji) nungertem den Nagaland team külemi tangokba noksa ka yangi angur.

**Patna, April 15 (Agencies):** April 12 nü Patna nung MP Verma All India Invitation Unity Cup nung Nagaland team Jharkhand den final asaya liasü. Kanga dang jangratema asaya ka nung Nagaland team-i Jharkhand team wicket 6 agi makok. Iba asayamung nung over 40 dang asayaa liasü.

Asaya nung Nagaland team captain Imliwati-i toss koka mezüing bat asütsü asoshi shimtet aser parnok over 40 nung run 198 yanglutet. Iba asaya nung taoba mapang India nung cricket asayar Dilip Vengsarkar aser Surinder Khanna na densema liasü.

Nagaland team-i parnok dang nungi tajungba telok ka den kanga junga asayaba ngua dena kanga süngmanga liasü. Aji süaka ajaki imla aliba ama Jharkhand team-i over 38 buba nung wicket 6 agi Nagaland akok.

Iba asaya ya Nagaland nungi aoba telok kati All India asayamung nung final tongtetba mezüingbuba lir. Final madong tsüingda Nagaland team Mizoram, Bihar aser Manipur den asaya liasü.

Iba asayamung ya secretary, Aditya Verma lenisüba kübok Cricket Association of Bihar (CAB)-i

achaayanga amung. April 4 nung 12 tashi Patna nung asayaba moapu 2 nung asayaba asayamung nung telok ajak agi 12-i shilem agi.

Nagaland team nung asayartemji; Imliwati Lemtur (C), Hokaito Zhimomi, Tahmeed Rahman, Jalaluddin, Sedezalie Rupreo, Shampri, Richu Dev, Mughato Chishi, Teni Chishi, Inakato Zhimomi, Nadeem, Imlikaba, Allem aser Liremo Patton nung liasü.

Maneni iba asayamung nung Nagaland team nungi spinner Tahmeed Rahman-i wicket 11 agia pa wicket timtiba agiba sempet ngua liasü. Pai asaya ka nungbo wicket 5 tashi agia liasü.

**vivo** APRIL 16, 2017 ASAYA  
Mumbai Vs Gujarat - 4:00 PM  
Bangalore VS Rising Pune - 8:00 PM

**IPL 2017** APRIL 15, 2017 ASAYA OSANG  
Kolkata-i runs 17 agi Hyderabad akok  
Delhi Daredevils-i runs 51 agi Punjab akok.

Lower Bayavu I Giants-i 4buba North Angami-I T20 Bash kokogo



**Kohima, April 15 (Agencies):** Lower Bayavu Giants-i tanü 4buba North Angami-I T20 Bash kokogo. Iba asayamung ya Parliamentary Secretary Khriehu Liezietsu-i senotsü teyari agüja Ziekezou, Kohima Village nung Brotherhood Group-i achaayanga aka.

Final asaya nung Lower Bayavu Giants puri Zeinuobadze High Flyers run 46 agi koka liasü. Toss koka Giants puri over 20 nung wicket 5 out sür rung 129 yanglu. Par telok rongnung Taciturn-i run timtiba yanglu. Pai run 34 yanglu aser iba sülen Imomenbai run 22 yanglu. High Flyers bowler Talibai wicket ana agi. Aji saka run arishiba nung High Flyers pur over 18.2 run 82 dang yanglur nung ajak out

süadok. Aduo aser Asuo nati run 25 aser 14 ta yanglua liasü. Lower Bayavu Giants bowler Sengulie aser SS Alam nati wicket asemsem agi. Iba asaya temer külen Giants pur captain Tapitu nem man of the match agütsü.

Iba asayamung nung takoker nem sen lakh 1 senpet agütsü aser iba sülen runners-up nem sen 50,000 agütsü.

Tanga sempet angurtem yamai liasü: Man of series-Tapitu, Lower Bayavu Giants (bike); Best bowler - Saroj, Peraceizei Royals, Best batsman - Imomenba, lower bayavu giants, Best discipline team - Kenuozou wolves.

EAC Kohima, Thejavizo Nakhro, asayamung tatembang sentong nung tetushi tesemdang liasü aser pai sempet agütsü.

I-League: Bengaluru-i 2-0 agi Shillong Lajong akok

**Shillong, April 15 (Agencies) :** Honibarnü I-League asaya ka nung Bengaluru FC-i 2-0 agi Shillong Lajong madak takok angu.

Bengaluru FC captain, Sunil Chhetri-i minute 26 aser par telok nungi Harmanjot Khabra-i minute 49 bubatem nung goal kaka yok. Tanü iba takok anguba ajanga asaya 16 asayaba nungi par teloki points 24 ngutetogo.

Bengaluru FC telok Shillong-i marudang northeast

nungisa, Aizawl FC nadak par moapu nung koka liasü.

Iba asayamung nung jenjang asembuba rongnung denera Lajong kanga meranga asayatsü nüngdaker. Parnoki tang point 24 ngua lir aser jenjang pungububa nungang lir.

Tanü asaya tenzüker minute 20 tsüingda nung Lajong-i goal yoktsü maongka tajung ana tashi magitetba ajanga iba tamakok angu.

Bengaluru FC nungi defender tar talang asem ;

Juan Fernandez, John Johnson aser Ranjan Singh nungeri Lajong forward tem anasa alutsü kanga saaka kümdaktsü. Par asem jagi Lajong nungi kanga junga asayasang Dipanda Dicka balaka kanga junga nokdangtet.

Bengaluru FC-i goal anabuba yokba sülen ano par telok nungisa Alwyn George-i metsüba ball ji tera agi goal mai, mesüra iba asaya parnok 3-0 agi akoktsüba liasü.

Mokokchung nung football exhibition asaya



Exhibition match metenzükdang Mokokchung Young Hearts United (MYHU) telok o 44 Assam Rifles na külemi telok noksa agiba ka yangi angur. (Mokokchung, 15th April, 2017)

**Mokokchung, April 15 (TYO):** "Sentinels with Sons of the Soil" omen nung ajemdaker Mokokchung Young Hearts United (MYHU) telok o 44 Assam Rifles na football exhibition match ka yangi 44 AR ground nung asayaa liasü.

Iba asaya nung MYHU teloki mezüing asaya tesadang

nung goal ka agütsü aser iba goal-ji 44 AR teloki tanabuba asaya tesadang nung küpzüka iba asaya draw nung tembang. MYHU telok nung team captain-ji taoba Nagaland Chief Secretary Alemtemshi Jamir IAS (Rtd) aser 44 AR telok nung team caption-ji Col. K.S Kataria liasü.

Tanü iba asaya tenzükba

sentong nung Mokokchung Town Baptist Arogo pastor Rev. Ponen Longchar den temoatsü meshia sarasadem. Sentong nung Alemtemshi Jamir, Col. Kataria, Dr. Watizülu, Nise Meruno, comedian Hopong Naga nungertemi shilem balala agia tesentepertem ayongzüka liasü.

Yimlibilema,  
ne temesen anepaluang

**LIVSAV<sup>DS</sup>**  
Syrup/Capsule

Whg. by: Medianta Research Health Products Pvt. Ltd. Thane (Maharashtra).  
CUSTOMER CARE- 022-4540143

**BILEMDANGANG**  
"Temeli azüokba ajanga lendong aika nungi kümzüker"